



PATNUBAY SA MISA



22 Setyembre 2019

Ika-25 Linggo sa Karaniwang Panahon

Taon K

Ang Sigasig para sa Paghahari ng Diyos

Tayo ay nagdiriwang ng *Ikadalawampu't Limang Linggo sa Karaniwang Panahon*. Ang *Magandang Balita para sa Linggong ito ay tungkol sa Tusong Katiwala*. Wala namang kinurakot ang katiwala. Ang kanyang maling ginawa ay ang hindi maayos na pangangalaga sa pag-aari ng kanyang amo. Ito ay nalugi dahil binawasan niya ang dapat bayaran ng mga may utang sa kaniya. Ngunit ang katiwala ay talagang tuso dahil sa kanyang ginawa ay nagkaroon ng utang na loob sa kanya ang mga may utang sa kanyang amo. Sila ang tutulong sa kaniya kapag wala na siyang trabaho. Tayo sana ay maging mga tuso rin sa paghahanap ng lahat ng paraan para maligtas.



PASIMULA



Pambungad

(Ipahahayag lamang kung walang awiting nakahanda.)

Sabi ng Poong Maykapal, ako ang s'yang kaligtasan ng hirang kong sambayanang tinutugon ko sa dasal na sagipin sa kaaway.

Pagbati

P – Ang pagpapala ng ating Panginoong Hesukristo, ang pag-ibig ng Diyos Ama, at ang pakikipagkaisa ng Espiritu Santo ay sumainyong lahat!

B – At sumaiyo rin!

Pagsisisi

P – Tayo ay binigyan ng Diyos ng karunungan upang gawin ang lahat para makamtan ang biyayang kaligtasan. Para sa ating kawalan ng sigasig, humingi tayo ng tawad. (Manahimik sandali.)

P – Para sa aming kakulangan ng pagpapahalaga sa kaligtasang iyong handog, Panginoon, kaawaan mo kami!

B – Panginoon, kaawaan mo kami!

P – Para sa aming kawalan ng sigasig na gawin ang lahat para matamo ang kaligtasang

iyong bigay, Kristo, kaawaan mo kami!

B – Kristo, kaawaan mo kami!

P – Para sa aming nanlalamig na pagsisikap na ikalat ang iyong regalong kaligtasan sa mga tao sa aming paligid, Panginoon, kaawaan mo kami!

B – Panginoon, kaawaan mo kami!

P – Kaawaan tayo ng makapangyarihang Diyos, patawarin tayo sa ating mga sala, at patnubayan tayo sa buhay na walang hanggan.

B – Amen!

Papuri

B – Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan.

Ikaw na naluluklok sa kanan ng Ama, maawa ka sa amin. Sa-pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P – Ama naming makapangyarihan, itinakda mong ang lahat ng mga utos mo ay mauwi sa pag-ibig sa iyo at sa kapwa tao. Ipagkaloob mong sa pagtalima namin sa mga ito, kami'y pagindapatin mong sumapit sa buhay na walang katapusan sa pamamagitan ni Hesukristo kasama ng Espiritu Santo magpasawalang hanggan.

B – Amen!

PAGPAPAHAYAG NG SALITA NG DIYOS



Unang Pagbasa Amos 8:4-7

Binabalaan ni Propeta Amos ang mga tao tungkol sa labis na pagpapahalaga sa yaman. Ito ang nagdadala sa taong magkulang sa kanyang mga tungkulin sa Diyos at manakit na rin sa kanyang kapwa.

L—Pagpapahayag mula sa Aklat ni Propeta Amos

Pakinggan ninyo ito, kayong sumisikil sa nangangailangan at kayong umaapi sa mga dukha.

Ang sabi ninyo sa inyong sarili, “Inip na inip na kaming matapos ang mga araw ng pamamahinga. Hindi tuloy namin maipagbili ang aming mga inani. Kailan ba matatapos ang Araw ng Pamamahinga, para mailako namin ang mga trigo? Tataasan namin ang halaga, gagamit kami ng maling takalan at dadayain namin sa timbang ang mga mamimili. Sa halaga ng isang pares na sandalyas, aming bibilhin bilang alipin ang taong dukha. Pati tulyapis ng trigo ay ipagbibili namin sa mataas na halaga.”

Sumumpa ang Panginoon, ang Diyos ng Israel: “Hindi ko na maipatawad ang masasama nilang gawa.”

Ang Salita ng Diyos!

B—Salamat sa Diyos!

Salmong Tugunan Awit 112

B—Purihin ang Poong Diyos na sa dukha’y nagtatampok!

R. M. Velez

The image shows two staves of musical notation. The first staff is in 3/4 time, with a key signature of one flat (B-flat). The notes are: Pu---ri---hin ang Po---ong D'yos na. Above the notes are the chords F, C, Dm, and Bb. The second staff continues the melody: sa duk--ha'y nag--ta--tam-pok! Above the notes are the chords F, C, and F.

* Ang Poo’y purihin! Dapat na magpuri ang mga alipin, ang ngalan ng Poon ay dapat purihin. Ang kanyang pangalan ay papurihan, magmula ngayo’t magpakailanman. **B.**

* Siya’y naghahari sa lahat ng bansa, lampas pa sa langit ang pagkadakila. Walang makatulad ang Panginoong Diyos, na sa kalangitan doon naluluklok; buhat sa itaas siya’y tumutunghay, ang lupa at langit kanyang minamasdan. **B.**

* Mula sa alabok ang mga mahirap, sa pagkalugami ay itinataas. Sa mga prinsipeng ay isinasama, nagiging prinsipeng ang mga lingkod n’ya. **B.**

Ikalawang Pagbasa 1 Tim 2:1-8

Ang mga Kristiyano ay dapat maging tagapamagitan sa Diyos at sa sangkatauhan. Wala sila dapat pinagkakaitang ipanalangin. Dapat nilang ipagdasal ang

lahat para sa paghahari ng Diyos sa puso ng lahat.

L—Pagpapahayag mula sa Unang Sulat ni Apostol San Pablo kay Timoteo

Pinakamamahal ko, una sa lahat, ipinakiusap kong paabutin ninyo sa Diyos ang inyong kahilingan, panalangin, pamanhik, at pasa-salamat para sa lahat ng tao. Gayon din ang gawin ninyo para sa mga hari at mga may kapangyarihan upang makapamuhay tayo nang tahimik at payapa, marangal at may kabanalan.

Ito ang mabuti at nakalulugod sa Diyos na ating Tagapagligtas na ang ibig ay maligtas ang lahat ng tao at makaalam ng katotohanan. Sapagkat iisa ang Diyos at iisa ang tagapamagitan sa Diyos at sa mga tao, ang taong si Kristo Hesus na naghandog ng kanyang buhay upang tubusin ang lahat.

Siya ang katunayan ng banal na layunin ng Diyos at nahayag sa takdang panahon. Dahil dito, ako’y hinirang na mangangaral, apostol at tagapagturo ng pananampalataya at ng katotohanang ito sa mga Hentil. Katotohanan ang sinasabi ko, hindi ako nagsisinungaling.

Ibig kong ang mga lalaki sa lahat ng dako’y manalangin may malinis na kalooban, walang hinanakit o galit sa kapwa.

Ang Salita ng Diyos!

B—Salamat sa Diyos!

Aleluya 2 Cor 8:9

B—Aleluya! Aleluya!

Si Kristo ay naging dukha upang tayo’y managana sa bigay n’yang pagpapala.

Aleluya! Aleluya!

Mabuting Balita Lu 16:1-13

Ang talinghaga ng tusong katiwala ay nagtuturo ng tatlong bagay. Ang una ay ang maayos na paggamit sa yaman. Ang ikalawa ay ang katapatan sa tungkulin. Ang ikatlo ay ang pagpili sa Diyos kung mangyayaring kailangang mamili sa Diyos o sa yaman.

P—Ang Mabuting Balita ng Panginoon ayon kay San Lucas

B—Papuri sa iyo, Panginoon!

Noong panahong iyon, sinabi ni Hesus sa kanyang mga alagad, “May isang mayaman na may isang katiwala. Isinumbong sa kanya na nilulustay nito ang kanyang ari-arian.

Kaya’t ipinatawag niya at tinanong: ‘Ano ba itong naririnig ko tungkol sa iyo? Isulit mo sa akin nang buo ang pangangasiwa mo sa aking ari-arian pagkat mula ngayon ay hindi na ikaw ang katiwala ko.’

Nawika ng katiwala sa sarili, ‘Aalisin na ako ng aking panginoon sa pangangasiwa. Ano ang gagawin ko? Hindi ko kayang magbungkal ng lupa; nahihiya naman akong magpalimos. A! Alam ko na ang aking gagawin! Maalis man ako sa pangangasiwa, may tatanggap din sa akin sa kanilang tahanan.’ Isa-isa niya ngayong tinawag ang mga may utang sa kanyang panginoon. Tinanong niya ang una, ‘Gaano ang utang mo sa aking panginoon?’ Sumagot ito, ‘Sandaang tapayang langis po.’ ‘Heto ang kasulatan ng iyong pagkakautang. Dali! Maupo ka’t gawin mong limampu,’ sabi ng katiwala. At tinanong naman niya ang isa, ‘Ikaw, gaano ang utang mo?’ Sumagot ito, ‘Sandaang kabang trigo po.’ ‘Heto ang kasulatan ng iyong pagkakautang,’ wika niya. ‘Isulat mo, walumpu.’

Pinuri ng panginoon ang magdarayang katiwala dahil sa katalinuhang ipinamalas nito. Sapagkat ang mga makasanlibutan ay mas mahusay gumawa ng paraan kaysa mga maka-Diyos.”

At nagpatuloy si Hesus ng pag-sasalita, “Kaya’t sinasabi ko sa inyo: gamitin ninyo sa pakikipagkaibigan ang kayamanan ng sanlibutang ito. Maubos man ito’y may tatanggap naman sa inyo sa tahananang walang hanggan. Ang mapagkatiwalaan sa maliit na bagay ay mapagkatiwalaan din sa malaking bagay; ang magdaraya sa maliit na bagay ay magdaraya rin sa malaking bagay. Kung hindi kayo mapagkatiwalaan sa mga kayamanan ng sanlibutang ito, sino ang magtitiwala sa inyo ng tunay na kayamanan? At kung hindi kayo mapagkatiwalaan sa kayamanan ng iba, sino ang magbibigay sa inyo ng talagang para sa inyo? Walang makapaglilingkod nang sabay sa dalawang panginoon. Sapagkat kapopootan niya ang isa at iibigin ang ikalawa, paglilingkuran nang tapat ang isa at hahamakin ang ikalawa. Hindi ninyo mapaglilingkuran nang sabay ang Diyos at ang kayamanan.”

Ang Mabuting Balita ng Panginoon!

B—Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Tayong lahat ay tinatawag ng Diyos na maging tuso rin sa pagsisikap na mapaghari ang Diyos. Puno ng tiwala sa tulong ng Panginoon, ating sasambitin:

B—Diyos na maawain, dinggin Mo ang aming panalangin!

* Para sa mga namumuno sa Simbahan, upang mapuspos sila ng karunungan at sigasig para maikalat sa sandaidigan ang paghahari ng Diyos, manalangin tayo sa Panginoon! **B.**

* Para sa lahat ng mga kabataan ng ating bayan, upang sa taong ito ng mga kabataan ay gamitin nila ang kanilang sigasig sa buhay para mahatak ang kanilang kapwaka-bataan sa pagpili sa Diyos at hindi ang yaman ng daigdig, manalangin tayo sa Panginoon! **B.**

* Para sa mga namumuno sa ating bansa, upang hindi ang pagpapayaman sa sarili ang kanilang hanapin sa pagtupad ng kanilang mga tungkulin sa taong-bayan, manalangin tayo sa Panginoon! **B.**

* Para sa mga taong nababaon sa

utang dahil sa maling paggamit sa mga makamundong bagay, upang makaahon sila sa kanilang pagkaka-utang sa pamamagitan ng tiwala sa Diyos at tamang paggamit ng yaman ng daigdig, manalangin tayo sa Panginoon! **B.**

* Para sa ating lahat na nagkakati-pon sa pagdiriwang na ito, upang mapuspos tayo ng sigasig para sa paghahari ng Diyos at para sa pagtulong sa mga taong nagigipit sa ating paligid, manalangin tayo sa Panginoon! **B.**

* Tahimik nating ipanalangin ang ating mga sariling kahilingan. (*Tumigil sandali.*)
Manalangin tayo! **B.**

P—Ama naming bukal ng karunungan at habag, isugo Mo sa amin ang Banal na Espiritu upang mapuspos kami ng tunay na sigasig para sa ikalalaganap ng Iyong paghahari at para sa pag-aangat ng aming mga kapatid na nababaon sa iba't ibang uri ng pagkaka-utang. Hinihiling namin ito sa pamamagitan ng Iyong Anak na si Hesukristong aming Panginoon.
B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, maawain mong kalugdan ang mga alay ng iyong sambayanan upang ang ipinahahayag namin nang may pananampalatayang matibay ay aming tanggapin sa banal na pakikinabang sa pamamagitan ni Hesukristo kasama ng Espiritu Santo magpasawalang hanggan.
B—Amen!

Prepasyo V

P—Ama naming makapangyarihan, tunay ngang marapat na ikaw ay aming pasalamat.

Ikaw ang lumikha sa tanan.

Ikaw ang nagtakdang magkaroon ng gabi at araw, gayundin ng tag-init at tag-ulan. Ikaw ang humubog sa tao bilang iyong kawangis na mapagkakatiwalaang mangasiwa sa daigdig. Ikaw ngayoy pinaglingkuran sa pagganap sa pananagutan ng iyong pinagtitiwalaan sa pamamagitan ng Anak mong mahal.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Si Kristo ay gunitaing sarili ay inihain bilang pagkai't inuming pinagsasaluhan natin hanggang sa siya'y dumating.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—Panginoon, hindi ako karapatdapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Binigay mong mga utos para sundin nang malugod, kaya't iyong itaguyod landas ng puso ko't loob, nang utos mo ay masunod.

Panalangin Pagkapakinabang

P—Ama naming mapagmahal,

kaming pinapagsalo mo sa banal na pakikinabang ay patuloy mong kaawaan at tulongan upang ang aming tinanggap ay siya nawang umiral sa pamumuhay namin sa araw-araw bunga ng iyong pagtubos na aming ipinagdiriwang sa pamamagitan ni Hesukristo kasama ng Espiritu Santo magpasa-walang hanggan.
B– Amen!



P–Sumainyo ang Panginoon.
B–At sumaiyo rin!

P–Pagpalain nawa kayo ng makapangyarihang Diyos: Ama, Anak, at Espiritu Santo.
B–Amen!

P–Humayo kayo sa kapayapaan upang mahalín at paglingkuran ang Panginoon.
B–Salamat sa Diyos!



Munting Katesismo sa Taon ng mga Kabataan

(P. René T. Lagaya, SDB)

ANG IBA'T IBANG URI NG PAGKAKAUTANG

Panimula: Ang *credit card* ay kinagigiliwan ng maraming tao ngayon. Ito ay dahil maaari kang makabili ng maraming bagay at makapupunta sa iba't ibang kainan kahit wala kang pera. Iniuutang mo ang mga ito sa pamamagitan ng iyong *credit card*. Ngunit ang utang na ito ay may tubo o interes. Hindi lang isa ang taong nabaon sa utang dahil sa kanilang *credit card*.

Pagpapalalim: Subalit ang utang ay hindi lamang sa pananalapi. May nagkakautang sa dangal at sa buhay. Ang mga nanira sa karangalan ng kapwa ay may utang sa dangal. Ang mga nakapatay naman ng kapwa ay may utang sa buhay. Ang iba naman ay may utang na loob. Ito ay ang taong nagawan ng mabuti ng iba kung kanino siya tumatanaw ng utang na loob.

Pagbasa: Lucas 16:1-13.

Buod: Ang pinakamadaling pagkakautang ay ang tungkol sa salapi. Kapag kumita ka ng sapat ay makababayad ka na sa utang na ito. Kapag nabayaran mo na ito ay patas na ang iyong pakiramdam. Higit na mahirap bayaran ang utang ng dangal. Kailangan itong bayaran sa pamamagitan ng pag-aayos ng nasirang dangal. Kung minsan ay dapat ding magbigay ng salapi para sa utang ng dangal. Higit pa rito ang utang ng buhay. May mga lipunang ang hinahanap na kabayaran para rito ay buhay rin. Ang sabi nga ng awit: “*Kapag buhay ang inutang ay buhay rin ang kabayaran.*” Ito rin madalas ay humihingi ng bayad na salapi. Ngunit kapag nabayaran na ang utang ng dangal at ang utang ng buhay ay patas na rin ang kalagayan.

Ang utang na pinakamahirap bayaran ay ang utang na loob. Kapag may nagmagandang loob sa iyo ay panghabambuhay na ang pagtanaw mo sa kaniya ng utang na loob. Kaya mong patawarin ang anumang maaaring gawing masakit sa iyo ng isang taong pinagkakautangan mo ng loob. Laging naghahanap ka ng paraan

para makabayad ng utang na loob. Magiging mabait ka lagi sa taong nagmagandang loob sa iyo. Hindi mo ipagkakait sa kaniya ang anumang hingin niya sa iyo. Ganito ang ginawa ng tusong katiwala. Pinilit niyang magkaroon sa kaniya ng utang na loob ang mga may utang sa kanyang panginoon. Kapag siya ay napaalis na sa tungkulin ay alam niyang tutulungan siya ng kanyang mga natulongang mabawasan ang kanilang mga utang.

Subalit ang talagang pinagkakautangan natin ng loob ay ang Diyos. Wala Siyang nagawang anumang masama sa atin. Panay kabutihan ang ipinamalas Niya sa atin. Kaya abot-abot na lamang ang ating pagpapasalamat sa Kaniya at pagtanaw ng utang na loob. Ang pinakamadaling pagtanaw ng utang na loob ay ang hindi paglulustay ng Kanyang pag-aari. Nilustay ng tusong katiwala ang pag-aari ng kanyang panginoon sa pagbabawas ng mga utang ng mga tao. Hindi natin dapat sayangin ang mga biyaya ng Diyos sa atin. Hindi natin dapat lustayin ang handog ng kaligtasang ibinibigay Niya sa atin.

Pagsasabuhay: Ang ating pagtanaw ng utang na loob sa Diyos ay dapat nating ipamalas sa pagsisikap na talagang lumaganap ang Kanyang paghahari. Ito ay mangyayari sa pamamagitan ng pagkakatatagan ng biyayang napagwagian ni Kristo sa higit na nakararaming tao. Sa ating pagpapasalamat sa pagliligtas ng Panginoon sa atin ay hangarin din nating higit na maraming tao ang maligtas.

Pagdiriwang: “Ama naming makapangyarihan, para Mo nang awang dinggin ang aming mga kahilingan. Isugo Mo sa amin ang Iyong handog ng Banal na Espiritu upang sa aming pagtanaw ng utang na loob sa Iyo ay maipalaganap namin sa lahat ng sulok ng daigdig ang paghaharing itinalaga ng Iyong Anak na si Hesukristong aming Panginoong nabubuhay magpasawalang hanggan. Amen!”



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• Illustrations: A. Sarmiento, B. Cleofe • Marketing: Fr. B. Nolasco, J. Feliciano • Circulation: R. Saldua